

Ulloq: 26.10.17

Inatsisartut aalajagiiffigisassaattut siunnersuut Naalakkersuisut peqquneqassasut Nunatsinni nioqqutissat akiisa OECD-imi inuussutissat naliginnaasumik akiisa agguaqatigiisinnerinut naleqqiullugu nunatsinni qaffasippallaarujussuarnerisa sumik tunngaveqarnersut misissussagaat. Misissuinerup malitsigissariaqassavaa iluarsisoqarnissaanut kiisalu ungasinnerusoq eqqarsaatigalugu qanoq akit appartinnissaannut siunnerfimmik aaqqisoqassasoq. Misissuineq UKA18-imi Inatsisartunut saqqummiunneqassasoq innersuussutigineqarluni.

(Inatsisartuni ilaasortaq, Per Rosing-Petersen, Partii Naleraq)

Misissuinissaq nunatsinni akit nunanut allanut sanilliulluta qanoq inissisimani, taamatullu pisiassat akii appartinneqarsinnaanersut nioqqutissanik pisiniarfiit allattut aaqqissuunneqarpata, aammalu allanut pisiniarneq ingerlanneqarpata. Siumumiit isumaqarpugut soqutiginaateqartoq itisilernerillugu qulaajaaffiginissaa.

Illumut nunatsinni niuertarfiit allanut nunanut pisiassanik piniarunik akit appasinnerit pitsaassuseq appartinngikkaluarlugu angusinnaavaat? Soqutiginarpoq akissummik pinissaq, aamma akissummik pinissaq pisariaqartutut Siumumiit isigaarput.

Ilaatigut soqutiginarpoq niuertarfiit ilaat nunatsinniittut ullumikkut Canadamiit, Thailandimiit, allaniillumi nioqqutissanik pissarsisarmata, taamaattoq nioqqutissanut akit qanoq nikingatigippat allaninngaannik tikisitanut sanilliullugit?

Pisianiariup qanoq akinik inissiisarnera eqqarsaatigigaanni aningaasartuutit kaaviaartitallu tassani iluanaarutissaq, sulisunut akissarsiat, innaallagiaq, pisiassap assartorneranut akit, allarpassuillu aningaasartuutit matussuserniarlugit taava pisiassat ataasiakkaat akii qanoq isikkoqarnersut pisiniarfimmu apuukkaangamik ilanngullugu Siumumiit paasisaqarfigissallugu soqutigaarput. Pisiassap aallaavia akikinnek nassaarineqarsinnaappat taava nunatsinni pisiassanngorluni annguppat akia appasinnerussua? Tamanna pillugu paasiaqarnerunissaq soqutiginaq.

Ilanngullugu assartuinikkut Royal Arctic Line´p suleqateqalernera Eimskip-imik taamaasilluni nioqqutissanik piniartarfiit nutaat periarfissanngorneratigut, assersuutigalugu Polen, tamanna qanoq atorluarneqarsinnaava? Pisianiarfiit namminersortut tamakkununga piareersarpata? Pisortat pigisaat Pilersuisoq periarfissanik nutaanik misissuiva?

Apeqqutit arlaqarsinnaasut matumani Siumumiit akissutisinissaat qilanaaraarput.

Taamaammat siunnersuut qulaani pineqartoq Siumumiit taama isikkoqartillugu taperserparput.

Jens-Erik Kirkegaard, Siumut